

四庫全書

子部

欽定四庫全書

子部

翰苑新書別集卷二

詳校官中書_臣康綸鈞

主事_臣祁韻士覆勘

總校官知縣_臣楊懋珩

校對官中書_臣牛稔文

謄錄監生_臣王宜

欽定四庫全書

翰苑新書別集卷一

劄子

上安撫陳待制

戴象麓

某伏以中冬殷月愛日開明恭惟某官倣開帥垣鼎新
教令一路忻躍三辰翊扶台候動止萬福某謹三薰沐
申慶函于籤府仰祈垂鑒

某頓首齋壇敢再上燕頤之儔竊惟昭代正人為天地

立心為國家壽元氣觀復之靜視履之祥存我者蓋所以厚蒼生也卷卷劾茵憑之請某一飯必祝

某邇者恭審出緯大庭開藩會府軍民恃以存活上寬西顧之隱憂道化得於源流僉謂北山之有子凡叨覆照舞蹈不知矧屬鞭驅懽忻何若某距踊三百

某恭以某官鴻名重望鉅業閑休日月衆目雷霆衆聽雖兒童走卒皆知戴詠初不待乎才俊滿前道古今而譽盛德者況某下吏方事鞭策之初惟知以直道上

安敢飾為諛辭佞語以自詒斥譴用是不敢惟先生鑒其愚直而畧之

某互鄉小子伏自違侍道德之尊動閱八載為養逐祿於塵埃捶楚中自揆庸鄙無他惟知罄竭寸赤期以不獲罪於細民而已向者筮尉信豐誤蒙麾使令辟試茲邑又值瘡殘之際民物煎熬五載爬梳技已窮矣健全莫措書生柰何淑後之圖未知攸濟天開奇遇棲身照臨寬以一分則何啻拜萬分之賜矣某無任戰灼忱禱

之至

某不辟犯嚴僭躡申懇向者恭遇授鉞開藩之始禮合
負弩先驅適值告謁東歸無繇俯伏道左拱聽新令贊
函通名之敬亦併臯緩罪當萬坐然事上禮也駢儷俚
文不敢以後期廢冒昧瀆倘沐原貸而覽擲之某榮甚
幸甚

某揆分有嚴不敢僭申層霄列仙之恭庀職微眇又不
敢冒祈崇臺約束之日惟先庚教條三肅請命

上李安撫

戴象麓

某伏以維辰良月肇序穡寶登豐恭惟某官麟符肅重
帝倚長城乾端坤倪續紛薦祉台候動止萬福某謹東
向百拜薰被泓穎控忱于鐵府仰祈鑒省

某仰惟一道保釐之寄九重眷倚之深雉堞百城宅命
師帥一飯必祝神共聽之衣衽之節鼎凡之彝百飮自
孚某謹不敢贅

某稽首道德重望如泰符麗天其去幾千萬級況江右

為州十一而斗邑又邈在梅邊英躔愈宵可望而不可
邇向者恭審高牙建府禮合申珪箋函約束有嚴遲回
不敢心旌搖曳徒劇尊詹

某恭以某官道契前脩望壓流俗一襟和氣如春風熙
霽而廉頑立懦則與烈日爭嚴千古在前萬世在後北
斗以南公實一人而已周旋中外所至傾心汲直在朝
淮南謀寢潁川奏最次公遽歸九重傾注履聲久矣十
連建牧暫勞于南綸音沓來跬步樞輔則霖雨之賜不

持西山南浦一方之私也某謹泚筆以嗣慶牘

某迂疎有素伉直无奇燈火半生僅叨末第急於祿養
冒注尉曹尸素二朞邈無寸績誤叨臺檄攝邑南康承
乏未幾遽蒙申辟朝命未下忽罹家艱解職方歸又準
臺命力奏起復懇辭弗獲忍死奉命惟是才薄不堪負
乘甫逾浹旬鄰寇復作邑遭再燬民復流離所在為墟
瓦礫彌望加以顛城一變皇皇愈不自安某自揆無他
惟一身與民相倚為命苟一毫有補公家有利百姓惟

力是視幸而解宇粗爾竝立民居粗爾安安靖循其繇
皆鎮撫一路之賜也某何有焉敢謂至仁在上與天無
私化鈞一陶退不忍棄不求識面不待先容獨以微勞
申剡于上一語重千鈞之力兩員收金璧之珍顧某何
人特辱茲選出於公舉真為千載竒逢誓以終身留作
一段佳話所恨職縻下邑無繇躬控謝忱姑寫寸丹敬
憑尺墨某下情不勝感激歸依之至仰乞台照

某蟻蝨小官塵坐姓氏事尊之初詎可無以自贅牽課

儷語披露推謝萬一之忱倘沐台慈霽威鑒誠榮佩千
億

某揆分崇嚴不敢躡申台閔福履之恭庀職微眇又不
容僭請大府約束之日進退皇惕伏乞矜原

上判府聶貳卿

戴象麓

某伏以中和紀節農扈觀春恭惟某官紫禁名流黃堂
靜治彤宸垂眷蒼昊薦加台候動止萬福某吉蠲泓穎
瞻望鈴齋冒昧申忱乞垂省錄

某仰惟戟衛邃嚴幙府簡重天相耆德台斗森羅矧巖
望與鬱孤而比崇恩波共贛水以長衍祝頌謏語某不
敢贅塵

某恭惟某官章天奎壁鎮地嵩衡凜凜千丈松不見節
目森森五兵庫亦納錐芒暫違禁閤之嚴出鎮藩方之
重以蒙泉而滲漉千里以泰道而振拔羣才如天運一
元雷動六合不惟蠖伸蟄奮各遂生生之樂而蟲鳴螽
躍亦興翬翬之思歌轉上聞詔由中出奮庸而熙帝載

燮理而亮天功此中外之所屬望也非某私僕

某一介小官奔走車塵馬足之下跪達牙纛僚更歲
自揆墮身塵埃筭楚中以下邑而視大府如平地之望
霄漢邈無津梯可假以詣泰階盈尺之地稟命令而受
約束惟切翹首台躔常若道德之光實照臨之某不勝
榮幸

某迂愚無用自知甚明以半世蒲竹之勤衫色方青以
雙親桑榆之景鬢華盡白備員一尉閱月將暮橫道無

先容之資出谷罕求聲之援邈在僚底寸進之階無絲
所入俸微三釜之計弗給分之安也誰其念之某官大
度包荒至仁兼愛需層霄之膏澤雖堯堯而亦需運大
匠之神斤雖侏儒而不弃凡當世之士經品題被容接
者莫不收名定價於龍門況某辱在屬吏一人之數哉
洗手奉公飲水厲行決不敢以負所學冒躡陳情某不
勝戰慄跼蹐之至

某行識卑迂文詞簡斐既不能為昌黎三書之獻又不

能致醜蔑一言之知擎拳寸心駢儷寸幅倘蒙錫之電
覽沐以春溫其為忻榮永矢銘篆

某戴惟一介庇賤分守有截不敢百拜僭申藕花庭院
冰雪方壺列仙羣玉之門伏恐屬邑合有約束事件仰
乞下

干黃提刑求合尖

戴象麓

某竊以夏律將中暑氣漸烈恭惟某官玉節倚天威惠
綽著天迪民詠台候動止萬福某謹蠲潔雪番九頓首

奏記籤府以寓南塾小吏辦香之敬干溷蓬巖伏深兢
灼仰冀鑒在

某竊謂大賢君子一身與和氣周流則起居動作皆百
順之所形見于以咨詢于以澄按何往而非錫福庶民
之極者下吏不勝至願惟勗功名之身式如玉如金
以遄鸞坡鳳掖之召

某恭以某官天付斯文之宗主身任當世之安危自綰
銅章紆墨綬之時已屹然為禹門一砥柱矣潢池之波

不得而動搖綠林之霧不得而昏塞則坐之廟堂聲色
不動而精神折衝談笑不勞而尊俎決勝江右偏壤豈
容久留十一州五十四縣之民則需澤矣而四海未霖
雨也西樞東府虛位以須某尚能歌有功見知之雅

某竊伏惟念當此英雄豪傑辰星落落之秋而一代之
偉人有如某官皆人所願執鞭望履者而或以勢分隔
或以微賤羞終莫獲仰瞻使星之末光於霄漢之上則
其目極皇華心遠翠節當如何其敬企耶維北斗昕夕

仰止容光尚新必照

其無能不才十手所措惟有朱愚白朴盡其責子民朝夕惴惴然惟恐一毫獲戾不容不益加畏焉幸甚瓜代近在六月誤蒙台慈不以小吏之愚且拙而聽民乞留之請特與諸司列銜剡上先生所以成就之意弘矣然行止非人代者已瞠乎其後所不獲終事先生天也日夕心口交誓倘此身未填溝壑無非圖報稱效奔走之日伏惟亮之

某三山儒素寡援少與格之以世道之風波則一番薦
墨念不到此有幸自天前繡使葉先生奏辟今任與免
職司常員一紙今歲之春又蒙本軍剴薦一章比者躬
詣憲臺面稟城築之役初非有乞漿之意而詰朝春風
之章恍從天下事出望外實天畀之也第禰生之鶚尚
欠其一石建之馬書五乃成九仞為山恐虧一簣聚沙
成塔全在合尖仰祈台慈垂憐孤寒特與成就則銜荷
恩紀寧有詣極某拳拳不勝頂踵歸依之至

上江提舉

牟存齋

某伏以木令維新芳意於初恭惟某官燕香侯度龍節
使華玉筍有歌璇霄委貺台候動止萬福某已雪吏腕
修敬賢士大之禮更不敢以分畫件具為恭先乞台照
某家三山之陰凝睇吳天名勝如林僑札罕過往歲別
太白東游九畹芷蘭有香滿國蓋當欽衽起敬而佇立
祇伏以拜下風幾若造物者之靳靳山見泰華水見黃
河而猶以為未見君子不幾曠半生乎

其欽以某官一代偉流海內寡二問學如總龜駟牙浩
博且富文章如美玉之脫乎璞質大圭之登乎藻藉夙
然不羣而盛心古道行止有常進退有度又不啻奏絲
桐於筍笛之表屹壘洗於盆盎之中而高出流俗也歎
霜待漏步武駸駸迫霄漢乃翻然為巨廬賦歸柳見羞
崑蓬有如此者士風不競久矣所以砥柱頽波轉移世
道者一世之望有攸屬而江西以來風流衣被文學之
照映氣類之欣合又藹然與嶽麓相頡頏其規撫氣象

蓋有在於浴度蕃宣之外也旂常鐘鼎何足為公道哉
某崎嶇歷落舉世一人且衣冠中最晚後叨第癸未今
二十春時事驅之流落至此誦少陵天吳紫鳳之句蓋
不勝其憔悴也汗青悠緬別乘叨蹤揆其人恰相埒而
諸公輒舉手相賀不賀其半刺而賀其得師也夫以平
生願執鞭勒之心乃今昕夕丈席幸可量哉僑寄北峯
屏息以俟時不敢躁代者諗以瓜熟進之退之所當俟
命於大府推是其觸事面牆實無一可以事君子公庇

而私識之切有望於今日

某已拂策諏龜膏車秣馬圖展望塵之拜侍覲且有日矣不腆彝敬之外輒先勒此以布腹心干瀆威尊伏紙兢惕餘祈百鍊莊倪七襄鄭榮晉歸碧落之班某隸也不敢躡申潭府列仙之間恐浙西有驅策事某敢重承

翰苑新書別集卷一

欽定四庫全書

翰苑新書別集卷二

劄

賀新江西帥衛參政

方鐵庵

其中冬謹月飛霜凝曉恭惟某官望尊承弼命錫保釐
列雉向風百神交職台候動止萬福某齋宿而后裁書
東向行府又百拜而後敢進仰乞台鑒

某載壯鈞用屬辰之請敬陳邦人來莫之謠望紫氣旦

天則曰是有福星來照臨此土也聞好風東來則相告
語曰是又吾東君也牙纛所向江靈候迎紗籠之身在
在次舍某愛助小忠更為百萬生靈恭致輔養黃庭之
禱

某茲審詔予重臣判大督府種棠蔽芾舊俗熙然騎竹
驩迎吾父至矣惟洪都為中興重地輔弼偃馬者固有
之其勲名赫奕相望先後則李忠定趙忠簡皆一至故
老所聞也大參政相公實再鎮故老所見也某一小吏

亦幸以其身親焉採一世之公論與一道之頌聲以自
及其一身之師慕與其際遇緝為儷語塵泥威尊犯分
有誅乞賜矜赦

某仰惟某官聲名在華夷功烈在彝鼎其規模宏濶精
神運用則在百世之上雖當世士能言之然念淳熙親
策儲宰相以輔聖後固欲其朝夕王所也十年鳳池自
有故實羣虎守關孤舟橫渡一出則十年斬馬事定善
刀亟藏久十年則十年不啻也午橋野服幾若忘世退

思巖中寧能忘君以時推之則當為蒼生起矣未坐之
廟堂以收垂紳縉笏之功乃授之祭服以訪佩玉鳴鑾
之舊腹心之謀與一臂孰急天欲平治巖瞻其舍諸

某家世于莆居最僻生最晚自兒童時則知有司馬公
矣嘗與四方人物共遊于釣播中又常與七聚編氓受
廛于賜履中顧泰階尺地猶天之不可階升也逐祿章
江于水則見西江于山則見洪崖意其猶有雄渾渾傑特
于此而未之滿于人則見真右史今又得見大參相公

真所謂洪河泰山不可以斗斛尋丈計子由年雖少亦
既見歐陽公矣及見韓公而後謂之盡天下之大觀引
領公衮以日為年

某一妄庸人至不足數徹名初贅賤請具陳年二十年
乙丑奏賦劒津冷泮以冗見稱居閑歲久有書不讀識
見短淺暗於時事隨羣計屬甫逾一年雙親諄飭毋苟
祿養疲精案牘僅守故常飛輓大計一籌不畫學之不
講面牆固宜願得大儒端拜而事公相分閭實天錫逢

位貌穹崇縮不敢進然本朝諸老嘗接後進矣大參政
相公先生尤以斯世人才為念某不足道而世之沈伏
下僚者多矣欲望鈞慈憐其不可任之愚察其不欲苟
之志豐殖而振德之此某與善類所望大庇寒士也嬰
突控瀝退聽戰悸

某謹畏冠屨之分不敢抵冒僭申鈞閱雲階月地福祿
之恭百吏仰首以聽油幢之號令某請預牛馬走之數

賀新江西帥曾參政

方鐵庵

某王春端月淑氣扶輿恭惟某官戒嚴大纛榮御華軒
四履歡迎百靈奔湊鈞候靜作萬福某謹注薰叟繭紉
賀大籤府嬰觸威重悸不自寧

某歲元日望斗牛間有紫氣煜煜然茲為何祥既而魁
台臨焉年貌孰若起居何如之間四海所同而西民獨
以為誇某語之曰斯鼎也將為天下調斯袞也將為公
歸考

某恭審起之東山命之南國鼎來十乘襟帶增雄雷動

三軍旗旌改色咸曰重臣實來防春無慮矣某觀昔之
勲業最著者趙忠簡以副樞至李忠定揆也相繼經理
整茲城池團結軍匠而閫之規撫始立增重上流造舟
教戰而江之門戶始壯不寧惟是蘄黃可撤事關鄰路
則請可行蓋守雖在江必節制行於江之外而后可守
今畫江而已又有柄分文恬武熙習以為常真右史昔
嘗有言於斯謂九帥皆可以治兵為先而帥江右者尤
當以治兵為急欲增團結之數推行之諸道練兵求將

或曰多事未一年沿江震恐其言果驗則辛巳歲也前此蘄黃日報平安自二城再葺之後不復報矣彼之血脈不屬吾之措置日緩公一代碩輔君相倚重惟所經畫真屹然長城也某拙於儷詞僅能以紹興帥洪之事獻為一道言耳若夫為一世謀則又推而為慶厯嘉祐焉辱巖電之一照覆醬瓿以亦甘

某洪惟仁祖臨御六年始策士于庭猶主上之慶元也太史奏五色雲現韓忠獻當之今某官則上之忠獻有

大學識有大力量有大氣節皆與之同茲鎮江右又與
出使陝右同以今揆前事則差難七百里江面少費經
畫顧脈絡關係則事有大於一面者靜觀天下安危之
勢熟察人心向背之機釐正中國外夷之體平持君子
小人之衡具有成式歷歷素定非嘗試用人之國者天
若昨宋垂紳縉笏措安泰山何遜乎韓魏公乃邦國之
光非閭里之耀雖然吾儕小人私切相語以為閩鄉榮
其居莆晚出歲乙亥秋調闕修門親擊登庸銜袖謁樞

府其既進而退也若屬之目得一眴於疑似猶使人不
忘況真蒙碩遇耶今使于此靡不奔走玉帳下而某去
有日獨其烟烟飯嚮為蒼生望太平則不在朝夕見者
後

某學迂而識不具得官十九年海上之羝猶乳獨青衫
自如出泮佐臺無補漕畫凜凜土偶推去何之入畿歟
無平戎之策可獻還山歟無負郭之田可耕營營親養
迤邐選坑所望於世者甚狹但願公相行道四方霖雨

某亦一物也倘兼收並蓄豈竹頭木屑之不如惟先生
念之

某揆分有則不敢躡等申潭府鈞眷興居之間且挑擔
欲行不敢具文請封部要束之目

賀江西帥真右史

方鐵庵

某冬謹孟月和泄小春恭惟某官雲來十乘風動百城
定省燕喜神示駿奔台候動止萬福某差辰治書諭詹
行府仰闔賀床乞賜紓檻

某竊望紫氣間有光屬天父老舉首曰福星至矣牙肅
所向江靈候迎然人一身負荷天地而茵憑致禱特出
於一道之私祝潘輿之行樂誦魯詩之熾昌者煜如也
某敢隨萬喙之後而貢愛助之忠

某恭審出綸紫宸授鉞洪都論撰獨穹於祕殿保釐增
重於潛藩非君相後天下以為心亦岳牧用詞人之故
事春酣闔郡電走先聲某耳聽除音慮在斯世但既為
江右一屬吏當為江右十一城生靈慶不腆儷語例申

賀忱意所激發狂不擇言嬰突有誅退而拱俟

某仰惟某官有司馬公碩望敵畏其名如陸宣公奏議
家有其書雖當世能言之士不能贊一語況某乎切嘗
妄謂自紹聖後士大夫出入北國家安危矣南渡涵養
每激必裂今日之事未至於激者殆天意也先生正色
立朝言中幾微始則羣而驚中則側而伺久則翕而服
然君側無人子思不安淮南寢謀汲黯亦出江之東泉
之南外庸彰灼羣心無異論豈猶以為未足而求多於

方面耶今一方肅清百度脩舉先生之意可自得於湖
山三邊未靖殘敵猶鬪先王之道實未行於朝廷疇昔
奏對之語歷歷著龜靡一不驗倘有以寇公不在中書
為問者似未知所答天欲平治舍我其誰蓋國人日望
之

某莆川一士姓字湮晦去秋之杪因道溫陵偕掣齋鈴
宣慈不鄙與其進賜之坐寵以饋而十五年前劔溪幕
府匆匆之一謁尚辱軫記始驚嘆大人君子所以收拾

人物者雖細不遺而某非其人也且感且奮粟違餘歲
小夫竿櫓縮不敢前而覘出處以為國之輕重者不在
有識者後炯炯歸嚮

某山林鄙野輟耕漫仕無趁時合變之長有固陋不通
之癖乙丑塵忝今十五年僅嘗冷宦於鐔津餘盡食貧
之歲月居閑廢學自棄誰尤天分最畜吏事尤甚計臺
列屬奚欠一寒良月三日甫交賤守以辨則訥以畫則
疎惕然四顧適有幸會洪儒開閭獲隸走趨父師在前

隨事書紳平生奇遇唯此時為甚仰冀熏慈弘造就之
恩以為晚學之依推錫類之仁以遂雙親之養頂踵蒙
賜權輿自今不負門牆當見他日伏丐矜體

某揆分有嚴不敢躡越申問行軒萱闈蓬島壽祺純嘏
之問百吏仰首以聽先庚之約束某願執厠役之下陳

賀陳安撫

戴象麓

某伏以六月維夏一雨先秋恭惟某官荷橐新榮藻旒
深眷制垣增重神衛愈嚴台候動止萬福某薰香滌頤

金匱要略卷二
百拜申慶茸燾之下伏祈鑒省

某仰惟天欲惠顧于一路為百城宅生之寄必有一代
宗工出應時望福星所次在在皆春頌德歌功融為百
順詎容小夫贅禱仰乞永照

某恭審錫命巖宸即真法從輿情胥悅瑰望愈隆某辱
在陶鎔尤深鼓舞伏惟慶愜某下情無任雀躍之至

某恭惟某官斯民元氣前輩盛心自任以當世之事功
悉本諸聖門之學力所養者皆諸老先生之未到所施

者真仁人君子之未能永鑑無心清徹牛斗陽春有脚
遍滿江閩暨出領於洪都益見知於丹宸適巨寇久為
於民患而數年未即於天誅帝曰尚勞朕憂僉曰莫如
公可久詔自天而甫下單車即日以載馳果見擒賊於
不一月之間未有收功如今日之捷宜頒異渥即正貳
卿然上方寤寐真儒剋復舊物以成中興第一之舉匪
伊一札起護諸將又非南浦西山所能留者某敢以天
下之所期望者輒因慶福而私布之

某區區申慶無以自見僭課儷語唐突匠師倘辱霽威
一展而擲之萬斯榮幸

某翹首紫府翠蓬大蜷邈在霄漢不敢僭申即日福履
何如之敬欽想休祥融液中外攸同

某伏恐下邑合有頒下教條謹百拜三肅以請

賀鄭建漕寶謨閣陞運使

方烏山

某伏以仲夏之月薰風微涼恭惟某官使節更新列城
改觀九重眷倚兩儀薦休台候動止萬福某薰被函牘

贊名賀麻伏俟裁幸

某欽惟庸使鉅人事權山重新綸初播川嶽動搖乾陽
坤陰效職順事尚何書生惠序之請為某敢畧

某茲者恭審陞華寓直增重使名天上星躔喜部封之
不改人間風采凜條教之一新凡在照臨同茲抃蹈恭
惟歡慶某恭以其官仁義道德為時儒宗器能政理為
今吏師其所閱歷所踐駁皆表表焉自植立非必以家
世為重者廣受並拜安玄內舉衆論歸向久矣慊焉不

居視麾節如鈞鼎履原隰如廟朝聖天子嘉惠遠人俯
徇雅志崇階顯秩即地授之其為七閩計甚厚顧如中
外之望何呂氏有夷簡韓氏有忠彥此我朝故事也袞
且歸矣惟日俟之某匪佞

某每念瀕海一寒托身垓北中異顧深知似有宿昔所
幸言守縻事不獲時時自進於琴瑟書冊之前後嘗坐
明道春風之和日竊子酸福星之照其為蒙茆徼福固
非八州泛泛僚屬比也傾心牆仞何嘗一夕不哦維北

斗之詩

某官冷如冰自春風披拂一番便覺枯菱朽枿頓有生
意長無鄭虔之罵友無孝先之嘲自非當世鉅公重人
顧遇主盟於其上鮮不免矣今使指益重巨蔭如天某
聿備桃李數中不必壯士自然顏色惟有益自脩飭庶
幾萬一他日不為品題之累某之所以報稱知己者在
此詞語狂狷惟先生實憐而撫之

某辱在門館下陳禮合稟求臺檄躬詣堦墀謁賀分不

可越謹課儷語一通仰干丞史是亦惓惓之義耳倘經
電矚擲去萬幸

某自揆么微不敢僭申相閱隨軒鈞輯之間共想由中
及外新祉鼎來樵水委令某雖無能役敬當端笏稟聽
賀蕭宮講著郎自倉除憲使 方鐵庵

某冬行成歲雪喜先春恭惟某官條令聿新光華益遠
帝眷神依台候動止萬福某有齋乃心薰被慶牘以請
于典籤仰祈省鑒

某已肅龜列申調燕羞吉星後先唯予直指是瞻平反
足以娛壽母陰德足以種子孫則身之福祉可知列鼎
重裯不待為門人愛助之禱

某恭審司庾策勲祥刑易節提封不改眷意實深方江
民有菜色特詔持節循行郡國為之發倉廩蠲租賦寬
和糴元氣漸復又慮十一郡揚抑之間豈無含茹授以
綉斧其併為疏剔之民不饑矣不寃矣使事有指勞還
之日將朝而問一歲錢穀幾何問一歲決獄幾何相業

於是乎出此上意也天下公言也

其仰惟某官學問有用而體則具議論甚高而實可行其經綸當世規撫宏偉要使一民一物咸與並生非固嫉惡太甚者然其立朝也適當消長之機其握節也若與薰蕕者對易為君子謀夫之剛決可也泰之包荒亦可也獨至於比之匪人或疑乎傷其當謹審也如此先生其必有以處之某短啓馳賀亦三致意焉蒙電鑒幸甚

其稟違英蕩之下閱日滋久小夫竿牘闕焉不嗣望列
宿之躔與使星之次芒寒色正凜凜在目

其不材佐幙絲粟無補竊雲天之巨庇倖滿已多蒙陶
鑄之大恩受知未報尚欠浮屠之穎恐為沉陸之蹤衛
大參雖有宿諾未之敢必來歲治歸躬造臺下控露謝
悃敢乞併照

其雖為門下士師閤崇嚴望之如天人不敢躡等申問
其尚為部內吏霜臺肇建合有新約束敢不恪聽行下

賀瑞州游知府

湯息庵

某伏以瑞靈餞臘粉荔迎年恭惟某官衛戢凝香歌襦
溢喜穹琅斐扈台候動止萬福某寅飭緘魚晉尾賀燕
首蘄省覽

某載惟循良迪化品彙宅生瑞日祥雲緝為純嘏葆餼
毓粹無俟於祈某敢畧

某恭審塗芝錫賸剖竹咨賢畫鹿夾輔甫涖江西之道
院銀龜開籙聿新天上之恩光伏惟慶愜欽以某官清

猷濟美粹學傳家以見聞殫洽簡當宁之知以道德風
流藹在廷之譽入儀朝序出懋民庸粵攝貳於扈卿盍
踐修於世職胡然高舉彌軫瞻懷姑憑熊軾以起家佇
渙鳳綸而趣覲某何幸拭目

某竄從睽眚婁閏義舒奏記無絲仰高唯切詎期天幸
茲竊鄰輝引脰雙旌忤弗自制

某出山成誤分壘奚堪補苴爬梳凜殫伎倆洊申詞請竟
闕俞音玩愒包羞淒其歸夢尚幾河潤倘以璧全某因

慶及斯憑楮增愧

某講信交鄰捧賀有贄輒紉儷櫝欽寘首箋斐拙弗工
垂粲斯荷

某惶恐端拜申詞台閔寶輯伏想堪祺茂介與歲俱新
秀江喻令丐勿剪棄

賀瑞州游太守

陳寺丞

某伏以青陽中御好雨催耕恭惟某官銅虎疏榮袞龍
倚眷民懷神僕台候動止萬福某露薌雪手奏記籤丞

虔祈丙在

某仰惟聖天子屬意牧守俾之名儒惠此高安非庸選也晨香夕燈祝公福壽者十萬戶不欠某矣祈鼎茵馬用贊

某恭審森陸塗芝專城剖竹古稱道院以事簡而民醇今得賢侯宜政平而訟理雙旌絢采五袴興謠欽以某官經國宏材康時碩彥家學紫陽之流派吏事潁川之聲名式觀侯度之修行見真儒之效公卿表選於此權

輿豹尾鷄翹故家舊物通觀偉績光紹前猷佇來黃紙
之好音端為青氈而出色某何幸親見

某猶記曩昔閣中曾侍先翁從橐之談笑從是晉謁潭
居又得一再參覲第未識麒麟之瑞抱此一欠有年矣
詎圖明公來鎮斗郡三隸氓編天寶相之維梓必恭但
拳拳誦周人之什

某投閑自分與世相忘泉石結盟似覺成癖託身地主
竊稍祠宮真煙粟也去秋浪遊赤壁徐訪雪堂想坡老

之風流慨周郎之英發俯仰宇宙感慨古今興盡言歸
復尋粉社一廛受比知有蘇天之可依某深竊自賀抑
以為邦民賀某修贄以文禮也紉緝駢儷焚玉麝以進
之燕賴不工唐突是嬰

某惶恐頓首端拜申問黃堂仙輯寅想尊尊幼幼簡簡
穰穰淮頭豈無委令願奉鞭影

賀瑞州游知府

陳寺正

某伏以四月維夏梅雨留蒸恭惟某官攸治方新民歌

來暮御屏簡記神物護持台候動止萬福某蠲吉裁書
以贅徹賀厦之私仰祈采矚

某聞賢侯履封之初叶氣歡聲融液百瑞歛則為一身
之福散而為千里之和申頌彝恭有言則瀆然區區愛
助未能自已更乞順乘朱煒精練黃庭前膺尺一催班
之寵

某恭諗疏榮天陞移鎮星江春脚肆臨下情胥懌恭惟
某官本家學以治民用儒術而飾吏半生敷歷四塞聲

猷既躋二令以為榮盡遣六卿而分列頃游試關決之
手上素知牧養之材爰命剖符重煩易地兩州之民爭
迎於境上我州如斗獨得而私之第虞未黔突之餘即
有不俟駕之召某憶記癸卯之歲學製劔水適在使星
照臨之下蒙比實多邇後萍蓬宦海無從一拜下風以
控謝忱豈期千騎頒春慨臨山郡某辱在受廬日與老
穉同戴二天覆燾之賜喜倍等倫屬靡偏壘莫充望塵
展敬躬致開閭之賀仰止麗譙形留神往

某謫材試郡了無善狀甫書初考善後尤難倘蒙不賜
鄙夷推所以治民之方而教之俾逃于戾曷勝厚幸某
夢遶家山何日賦歸去來首圖伏謁賓墀以展維桑之
恭某憑楮拳切

某贊敬之始非文無以見意紉緝數語少露依向辱一
眄而置之覆瓿焉未為不遇

某仰止燕寢凝香之緝神仙其居福祉之來河漢無極
盱江雖陋豈無堪攷驅策拱聆行下

賀游太守

新鄂州辛料院

應鑑

某伏以春先侵臘歲事將圓恭惟某官雙旌有輝千里
望澤三神具依台候動止萬福某吉蠲毫楮申候籤曹
仰祈鑒在

某載惟漢制選朝士補郡國守相選刺史入為三公其
任至不輕也節宣之請固小夫之庸敬然集一身之福
推之以福生民福軍國福君親皆自此基焉敢告二御
倍萬加意某幸甚歲在庚子豫章鎖闥獲拜立玉之標

聆霏屑之誨蒙軫念先君子嘉定間湖右樞趨先太師之契至不薄也惟是猪龍有異迴隔升沉勿勿違拜倒指十有五稔矣台斗益高徒厪山仰

某恭審飛綸中禁起牧名城望實素孚耄倪交慶仰惟歡忭欽以某官德履之粹然學問之淵然才識政事之卓然方今人物不落第二矧陟敷滋久風采著聞外而牧養之勲內而羽儀之望青天白日奴隸皆知為清且明矣瑞民何幸得此賢侯不待酌樽中之綠問山川之

靈駕輕就熟課最暮年二十五星之郎位八十一乘之
屬車於皇召綸必命公矣又焉用佞

某社櫟才樗閨楊命薄五到蘭闥一官牢落備歷辛勤
披身荆邑之間丞郡桐鄉之地誤蒙化地軫記俾分料
武昌祇戍之期近在春仲羽檄交馳之秋轉餉為急鉉
鈍無庸豈堪一割辱念國事之重脈絡本司特有以教
警言之不勝至幸僭越有言臨楮兢惕

某斂衽翰墨宗工已非一日蕪辭俚語詎容妄進然維

桑之敬捨是無以自見短啓不文辱賜電徹榮耀過於
褒袞某緬想蓬山閨苑玉佩霞裾瑞靄繽紛慶事演迤
洪州或有委戒毋敢不恭

賀瑞州游知府

王吉守 備

某竊以洪鈞一轉萬象皆春恭惟某官風泊兩轡塗歌
五袴神薦新釐台候動止萬福某敬飭繭番闕候燕寢
惟司籤者優容之

某載惟盡性以贊化育致中和以位天地皆吾儒實身

之心學講明工深力到黃庭衛生之請非聖哲書不敢以褻

某伏審疏恩宸陞欽惠瑞陽條教誕敷棠陰已蔽某阻
遠未由於面賀緘辭敬拜於手書具體而微惟錄其意
某恭以某官冰壺水鏡之胸次孤峰峭壁之詞華所操
已見於立朝出守始所以行志自詩書仁義中流出膏
澤以福高安之民曾日月之幾何已恩波之不盡鼎來
銀信催度玉墀政恐江西道院未能久留朝天步武也

某耳溫譽譖如斗杓芒寒可仰而不可即追念往歲獲
侍同朝獨以未披宿霧徒勞我思突兀高牙又一驤首
某才非適用樣弗入時得州於公私掇拾之餘百孔千
瘡隨補隨鑄未能寡過凜凜曠瘳幸邇隣輝可親柯則
況有滕事齊之便願沾楚及晉之波鄉風皈依布露髣
髴

某企翹游焉息焉之仙輯邈在霏煙縹緲間福英祿華
積中發外預有凡委式克欽承

賀瑞守游寺丞

江西趙憲

崇熾

某伏以青陽開動生意無邊恭惟某官煜然旌麾煖被
襦袴台候動止萬福某雪手杼賀併酢恭先竊幸流盼
某聞諸山谷之賦有曰製菑蓄以為裳釀清泠以為酌
蓋為高安二千石設也五馬專城茲在茲地不敢外是
以贊二御

某伏審皂蓋偃藩錦砂濡印宣化有淑觀風預榮有如
某官師友之源仕宦之譜惟祖惟父蓋家傳而守之共

理惟良復以幸康廬者幸錦水安得如結輩者十數參錯天下為邦伯哉選表公卿舍是何適

某強顏駕壯九閱月冀兵刑事重正賴肘掖之助丹砂九轉鑄鐵成金俾句吳之墟無有私鬪而教訟者蒙成不其侈歟儼語寂寥始以寫意匪投也

某臨楮皇恐拜問黃堂珠璧之眷計想自天錫羨罄無不宜或恐司存有委唯所以命

翰苑新書別集卷二

欽定四庫全書

子部

翰苑新書別集卷

四三

詳校官中書_臣康綸鈞

主事_臣祁韻士覆勘

總校官知縣_臣楊懋珩

校對官中書_臣牛稔文

謄錄監生_臣王宜

欽定四庫全書

翰苑新書別集卷三

劄

通程內翰

方壺山

某伏以孟夏謹月恭惟某官旗纛戒嚴德望填壓神天拱
衛台候動止萬福某敬熏沐九頓首奏記戲下仰乞財
幸某申詞彛儀已嚴右剡比辰麥秋清潤暑氣未炎不
諗召用何似欽惟道德詞章之老蕃宣屏翰之望動息

之頃安危所關敢乞體瑯旒之眷厚永給之奉對揚環
召歸秉事樞其翬

某茲者竊審冠班奎閣作牧潛藩溫詔趣行仁聲載路
伏深歡忭某待罪道傍縣令行當鞠躬歛板盤辟雅拜
於車塵馬足之間引領前旌無羽飛肉

某恭以某官龍章鳳姿之表足以儀刑百辟地負海涵
之學足以貫穿千古日光玉潔之辭足以羽翊六經先
帝簡拔以遺陛下二十年來朝廷大議論大典冊皆出

其筆他學士傍觀而已昔陸宣公秉筆於奉天蘇長公
代言於元祐汪龍溪視章於建炎皆於翰墨之間有以服
天下之心鼓天下之動大雅不作非我公其誰繼之今
茲抗章勇退巖顏毅色不以三公易其介凜然有古大
臣出處進退之風矣皇上勉留數四雅志莫回便朝引
對龍光密勿識者以此覘魚水之眷素厚風雲之運方
開建雖巨藩安能鬱鬱久居者歸衮衣宣青麻其何幸
拭目

某海濱賤士少於方冊傳誦夫子之辭章壯從縉紳講
貫賢人之德業居常積泰山北斗之瞻思一快景星鳳
凰之觀而不可得敢謂高牙大纛來式南邦遂獲以附
庸小吏受察於使天之下永言際遇云胡不喜

某莆之鄙人祖父皆奮寒苦歷清望至某失學始不能
世其家北遊江淮南驚嶺海偶然脫選以格試縣實在
四通八達之衢羣嘲衆笑之地某戴星治事飲冰律已
兩考又七閱月矣末路兢兢愈危愈懼一旦天惠仁牧

來照臨之方且與百里髦倪游詠歌舞於祥風慶雲之
內豈非幸歟至於保全覆護之請當開府建牙之始仁
行如春威行如秋某敢私禱以干大戮惟閣下裁哀之
某公守綦賤不敢申貢行府瑤輯福履之問伏恐屬邑
有驅策事件乞賜行下

通楊左司

方秋崖

某伏以風露雙清秋宇如拭恭惟某官雍腴卽省翊亮
宰涂吉衛紛綸台候動止萬福某雪研薰毫敢專拜羽

忱於典記者

某謂帝遴碩賢調娛鼎寶噓呵元氣笙鏞至和寶令循
彝謹毋庸瀆

某仰惟先正太師以甘盤舊學金玉睿明未究經綸上
意有屬某官濟美巍科舒翹清路懷香武部承耀辰階
紹興天子謂學為宰相者匪公則誰顯相吉辛綠綈褒
擢以丕昭前人光某尚親見之

某三生機緣叨尾題雁飄茵墮砌終然分殊山翠蒙密

無從以隻字入地城分也匪嫚也容光必照焉

某生無媚骨與世少諧七稔耕雲百念俱冷分麾縮戍
莫遂祈閑有旨趣行冒然祇役自矢冰蘖謹護本根第
揣狷迂未知攸淑每念小孫某濫次童科階榮仕版陽
和粲筆成始成終菌幹桐枝生意彌滿緣是徼福俾我
熙臺游泳九霄雨露中某知免夫

某寒涉蛰吻詎應晉絳鈞韶然舍是無以旌悃悞流電
垂灼億禘其榮

某仰只瓊樓玉宇雲氣高寒敢替不敢問偏壘百觥惟
命之恭

通隆興帥曹吏部

方壺山

某伏以閨餘謹月霽景留春恭惟某官坐鎮方岳帥表
徹侯帝眷神依台候動止萬福某一介吏屬贊敬齊鉞
之下必薰被而后敢前仰祈財鑒

某聞元氣在身猶忠賢之在國也寸膚無不愛而培養
則有所當先者自公之西寬上憂顧四肢強矣願進內

君子之說以強國脈某既以公譬之國願公以國而愛其身

某近觀有叩天氏閤者劇論當世人物惟某官為第一質之卿士採之國是如出一口非一人之私言也蓋學問準的於聖賢而倫不詭名節著明於事功而慮更深漢上之變湘中之寇蜀邊之擾談笑底定是特一班忠言至計欲吐更多千里見王及畿而返出鎮江右又復踰年人心勃然遂激而為叩閤之書者金蒙古相形和

戰守未定欲決國論問誰可相無如公者敬請促裝

某僻居于莆望康廬精舍有一世大儒在焉家貧且遠
無說裹糧說屢戶外麾節徜徉疇不有遇獨未得如半
山事韓于楊后山事坡于穎懷此有年乃令以計屬一
寒奔走玉帳下召還有日賤成在秋或者未至之已遲
凜乎趨承之靡及

某拙根於天賦學無所師承乙丑叨塵忝需冷次七年
劒學僥滿又需今次四年閑之日不自力仕而學則已

疎餽餉責殷裨贊謀嗇奉二老以就養喜元帥之有依
曳組白事與列屬俱執經問疑以諸生見教警提撕倘
自今始是明公一日之留寧不為賤子一生之幸

某通明之初合一莊毫素以極其尊敬之意束於牘制
短啓將誠語言不工自速誅絕倘經電督沒齒餘榮
某惕畏株守不敢僭申使閤崑閬之嫺即日如天之福
伏恐蒲中有筆策件某歛衽而聽要東

通王安撫

劉後村

某伏以仲秋謹月恭惟某官閭鉞尊嚴威靈仁洽穹厚
昭貺台候動止萬福某敬薰被再拜奏記戲下伏祈財
幸

某愛取小忠輒忘重出比辰積雨初收風露不爽不諗
台用何似欽惟道德之老慈惠之師與物為春與天為
徒固已備乎中和之氣不導引而壽矣世俗膳服之禱
某謹不敢贊一辭

某竊以其官有管仲樂毅之才故豪傑仰其高有賈誼

陸贄之學故拘儒服其通有汲黯張昭之節故諂子憚
其嚴立乎本朝道合則留不合則去嗜名義如飴蜜棄
榮利如涕唾二十年來舊人日少明府執牛耳獨主齊
盟可謂魁壘骨鯁之臣矣深惟今日局面至急擔子至
重非閣下發大願力有大氣魄誰與領此閩疆樂土願
無淹留某拭目以觀衮歸

某側聞侍郎於八州五十縣屬吏教之而已未嘗誅譴
也董之而已未嘗操切也有慈父嚴師之意焉某於此

時獲叨明社與里胥亭長同受約束於大都督府顧非幸焉引領轅門且喜且懼

某兒時便蒙賞音歲月幾何忽焉老人北戍淮南度嶺髮禿齒落所成何事其羞辱知己甚矣道傍劇邑宜得健令某罷輒不勝任一可慮孤危不自保二可慮衡此二慮欲前復卻然終不免一出仰恃侍郎鎮物如山容物如天豈不欲庇一門下士乎至於佩孔門學愛之訓味蓋公清靜之言推廣元帥詩書禮樂之化則某不敢不

勉

某事上之始法當通名惟是筆硯廢放文義鄙淺必為
帳下兒所嗤倘蒙重仁俯賜覽矚某幸孰甚焉

某退循分守不敢申貢使閱尊眷福履之間某伏恐下
邑有一切驅策恭請放下

通鞏漕權帥

方壺山

某伏以矩秋得正穡寶告成恭惟某官雙組熒煌列城
震竦天維顯思台侯動止萬福某行矣伏謁闕
敢潔

卷三
滌旅玆慶于記府僭祈電矚

某再申詞禮諭述頌聲闡之十連即臺之一道不加富也而事權則加重歡謠則彌望觀風亭上襟帶堂中同一主人有川后山君之隤祉何饗人鯨子之足云

某恭審外臺底績中旨疏榮就兼督府之權益壯洪都之勢伏惟歡慶竊觀中朝人物所謂卓然俊偉者萃在江西方曹公之鎮於此先生之漕于此同時皆以右侍郎至人曰兩吏部也今帥以簪橐陞矣先生兼節鉞而

佩之蜚輓之功既高保釐之績彌著叢此外庸入當籌
幄次則來以三銓召以二卿執轍具在蓋視曹公有過
無不及也非獨以國之論云然

某日者飾固陋之辭展趨承之敬屬吏禮也陂量容涵
不抵于地幸矣報之書愈幸矣珠玉頻賜又講施報幸
出望外拜賜而驚傳觀已遍襲藏不朽今復弗揆紉緝
儷詞修賀則宜游瀆有罪

某居貧日久携扶頗難遠騎踵門瓜期往成仰體薰慈

矜念其屬之意盡室飯感以中秋後三日間塗行行及
憶觀瞻道德依倚聲光真副不空此生之願然久閑驟
出進趨朴野語言拙訥不能逃臺參之一見必矣雖曰
久心厥職豈能自效所長預恐曠廢仰祈容覆有請至
再伏紙凌兢

某以卑事高仰視使闕自有等威不敢凌躐而貢起居
之問

某自閩涉江將入部內竊視條教某用敢薰被以請要

束之頌

通王運使

劉後村

某伏以孟秋謹月恭惟某官弭節行臺風采竦動后皇
簡相台候動止萬福某敬薰沐拜手登名主書伏乞財
幸

某申詞彛儀具嚴右染比辰秋氣尚淺餘暑未清不審
台用何似敢丐體藻旒之眷厚裊鼎之奉對越嚴召入
登要津某忱扣

某恭惟某官以忠孝傳家以才業發身以力量運用斯世明足以發摘而養之以晦剛足以擊斷而發之以和臨郡國則著甘棠之愛立朝廷則負喬木之望蓋管葛之器識荀賈之謀知龔黃之政事王謝之文獻悉兼之矣輟從華省奉使全閩八州數十縣吏民畏之愛之如秋霜嚴而春日溫也瞻之仰之如福星臨而喬岳鎮也上方圖回一新號召四出趣歸禁近超秉事樞有元祐鼻祖之衣鉢在某非敢為諛

某少窺方冊尊慕奕葉之忠節壯從縉紳講貫當世之大名仰觀宮牆邈在霄漢陸沉下士未觀鳳星乃今作吏一行沒階而赴望塵而拜將自此始非天侈其逢乎請言幸會喜懼交并

某家世莆田老人大父皆由寒苦自奮某不肖不能紹先

其一介小吏僭越通名之始謹齊沐牽謂短啓少贅下忱塵滓太清蕪醜汗下辱賜覽擲榮感萬分某不勝皇

懼之至

某揆分穹巖不敢僭申隨軒蓬方列仙之敬庀職微眇
又不敢請先庚之令惟教條頒新所以惠幸下邑者某
俯伏三肅俟命

通吳運使

戴象麓

某伏以春用季琯雨足江犁恭惟某官叙建計臺仍開
帥閫玉旒寬顧三辰贊襄台候動止萬福某謹齋明拜
手薰被裁賤東望星輶少伸卷卷燕賀之禮仰祈矜

體

某欽惟聖天子惠顧江右百萬元元借重儒魁出司邦
餉福星所舍一路皆春叢社隤祥弗禱自輯其一介小
吏謹不敢以律襲彝語塵溷茵憑之下仰乞涵貸

某恭審某官疏恩天陞總餉星臺拜詔即行單騎赴軍
民之望受知最厚雙龜兼臺閫之雄教令方新吏民交
忭伏惟慶愜某不才賤吏學製偏陬屬受容受察之初
實與一道耄穉同此鼓舞仰乞矜察

其恭以其官中庸之學自明而誠剛大之氣配義與道
所養者得周程正大之學問直自家傳故發而皆孔孟
經濟之事功蔚為世用遂以海內寡二之學而收人間
第一之科自寶劔之發新硎如輕車之駕熟路出宣漢
詔入簞周行秉撰祕儲旋討論於史院進陪銓部復密
贊於樞庭方貴騰日月之名盡蚤上星辰之履帝念江
西數郡久罹兵旱之餘公實斗南一人暫出虛危之分
外給貔貅之萬竈內安鴻雁之羣居為朕寬南顧之憂

少蘇鮒轍即日渙東歸之詔行覲龍光某敢以中外所期僭者輒於塵幅之末私布之某皇汗僭越

某皇恐小官事尊之初禮合為小啟贅賤名於函席之前約束有嚴不敢冒昧進退維谷仰乞矜原

某塵坐小吏景慕魁斗在天可望而不可迎不圖天畀奇遇獲預鞭策使令之末榮幸何如第以生長孤寒稟受庸拙業儒無術試吏罔功區區自揣僅有一寸愚丹小廉小謹律身恤民以報國家終始不替而已惟是學

製無譜善後尤艱方此凜然而忻際先生持節洪都以
幸一路玉振金聲何啻大鏞之在東序俾一命以上皆
得假春容之聲以警所不逮先生之惠後學弘矣某奉
拳歸向之切

某私竊自慶以下邑而申大府起居之恭以屬吏而請
崇臺驅策之目皆僭也某併用不敢惟先庚教條某謹
百拜以請命下

翰苑新書別集卷三